



略明攝正法願

攝正法行

廣明攝正法行

法大

正說

請說

勝鬘白佛：我當承佛神力，更復演說攝受正法廣大之義。

許說

佛言：便說。

總示

勝鬘白佛：攝受正法廣大義者，則是無量，得一切佛法，攝八萬四千法門。

別說

攝受正法即正法

舉喻

大雲注雨喻

譬如劫初成時，普興大雲，雨眾色雨及種種寶，如是攝受正法，雨無量福報及無量善根之雨。

大水起世喻

世尊！又如劫初成時，有大水聚，出生三千大千界藏，及四百億種種類洲。

如是攝受正法，出生大乘無量界藏，一切菩薩神通之力，一切世間安隱快樂，一切世間如意自在，及出世間安樂劫成，乃至天人本所未得，皆於中出。

大地持重喻

又如大地，持四重擔。何等為四？一者大海，二者諸山，三者草木，四者眾生。

如是攝受正法善男子善女人，建立大地，堪能荷負四種重任，喻彼大地。何等為四？

謂離善知識無聞非法眾生，以人天善根而成熟之；

求聲聞者，授聲聞乘；

求緣覺者，授緣覺乘；

求大乘者，授以大乘。

是名攝受正法善男子善女人，建立大地，堪能荷負四種重任。

世尊！如是攝受正法善男子善女人，建立大地，堪能荷負四種重任，普為眾生作不請之友，大悲安慰，哀愍眾生，為世法母。

大寶依地喻

又如大地有四種寶藏。何等為四？

一者無價，二者上價，三者中價，四者下價，是名大地四種寶藏。

如是攝受正法善男子善女人，建立大地，得眾生四種最上大寶。何等為四？

攝受正法善男子善女人，無聞非法眾生，以人天功德善根而授與之；

求聲聞者，授聲聞乘；

求緣覺者，授緣覺乘；

求大乘者，授以大乘。

如是得大寶眾生，皆由攝受正法善男子善女人，得此奇特希有功德。世尊！大寶藏者，即是攝受正法。

結成

世尊！攝受正法攝受正法者，無異正法，無異攝受正法，正法即是攝受正法。

攝受正法即波羅蜜